

四庫全書

集部

欽定四庫全書

集部

御定歷代題畫詩類卷六十八至

詳校官侍郎_臣李封

主事銜_臣徐以坤覆勘

總校官降調編修_臣倉聖脉

校對官編修_臣繆晉

謄錄監生_臣謝式南

欽定四庫全書

御定歷代題畫詩類卷六十五目錄

仙佛類

釋迦出山息軒畫

金密公詩

楊祕監釋迦出山像

金路仲顯

題龍眠釋迦出山像

元柳貫

題釋迦出山圖

元柳貫

獄中見壁畫佛

唐劉長卿

畫圖見金粟佛

宋黃庭堅

僕叢於長安陳漢卿家見吳道子畫佛碎爛可惜

其後十餘年復見之於鮮于子駿家則已裝背

完好子駿見遺作詩謝之

宋蘇軾

記所見開元寺吳道子畫佛滅度以荅子由

宋蘇軾

軾

題彌勒像

宋米芾

問蔡肇求李公麟畫觀音德雲

宋蘇轍

題劉氏所藏展子虔感應觀音 宋黃庭堅二首

醉作觀音像仍為書贊 宋白玉蟾三首

題辛澄蓮華觀音像應制 元揭傒斯

觀世音菩薩贊 明焦竑

規公業在淨名得甚深義僕近獲顧長康月宮真

影對戴安道所畫文殊走筆此篇以展瞻禮 唐

李羣玉

過廣愛寺見三學演師觀楊惠之塑寶山朱瑤畫

文殊普賢

宋蘇軾三首

將出洛城過廣愛寺見三學演師引觀楊惠之塑寶

山朱瑤畫文殊普賢

宋蘇轍三首

畫文殊普賢

宋蘇轍

武宗元比部畫文殊玄奘

宋蘇轍

貫休應夢羅漢畫歌

唐歐陽炯

題龍眠十八尊者

宋劉克莊

題羅漢過海圖

元吳澄

羅漢圖 元吳澄

渡水羅漢圖 元袁桷

羅漢圖 元袁桷

羅漢圖 元虞集

畫羅漢 元虞集

李公麟大阿羅漢圖 元吳鎮

題泰東山藏主十八開士圖 元張翥

畫羅漢 元李祁

題過海羅漢圖

元王循二首

題羅漢圖

元釋恕中

題楊子文羅漢渡海圖

明張以寧

題過海羅漢圖

明僧義金

次韻張仲舉承旨題盧楞伽過海羅漢圖

明僧來

復

過海羅漢應供圖

明僧來復

題景煥畫應天寺壁天王歌

唐歐陽炯

題徐商叟所藏李伯時四天王圖

宋王炎

梵隆護法神

元袁桷

僧傳古坐龍圖

元王惲

稠禪解虎圖

元王惲二首

水墨達磨像

元張翥

題達磨像

明張鳳翼

題寒拾圖

元袁桷

畫兩僮枕帚而睡疑是寒拾應人索咏

明徐渭

嶺南六祖禪師菩提樹下藏髮窺子圖歌

元吳萊

題李伯時畫船子和尚

宋王復道二首

跋船子和尚圖

元王惲

題趙千里畫船子和尚卷後

明王世貞

觀壁畫九想圖

唐包佶

鬼佛

宋朱子

梵隆畫番王獻佛圖

元吳師道

吳生畫

金趙秉文

謝人送栗鼠尾畫維摩

宋黃庭堅

楊惠之維摩像

金趙秉文

題李長者畫像

宋孔武仲

題帝王禮僧圖

明王世貞

題張僧繇醉僧圖

唐僧法照

題畫僧

唐張祐

畫醉僧

宋陸游

靈照度丹霞圖

元王惲四首

題僧圓澤託生圖

元 吳澄

題本中峰觀蓮像

元 倪瓚

題雪寺歸僧圖

元 程鉅夫

秀上人課經圖

明 劉泰

畫高嶺莫行僧衆

明 徐渭

題王霽宇繡佛齋圖

明 董其昌 二首

御定歷代題畫詩類卷六十五目錄

欽定四庫全書

御定歷代題畫詩類卷六十五

仙佛類

釋迦出山息軒畫

金
密公壽

龐眉袖手出巖阿及至拈花事已訖
千古雪山山下路
杖藜無處避藤蘿

楊祕監釋迦出山像

金
路仲顯

自從此老出山隅
惱亂蒼生底事無
他日若逢楊處士

只教畫箇涅槃圖

題龍眠釋迦出山像

元
柳貫

明星在天斜漢落
佛道靈明魔道弱
修行已證等覺位
不顧身形瘦如削
華縵垂袒雲半肩
步出山來赤雙脚
文殊低眉普賢笑
滿谷天風韻天樂
青蓮貼貼印虛空
白象眈眈係羈絡
自茲應物如洪鈞
五陰五濁皆清廓
龍眠昔是會中人
以心應手親描摸
纖煤利穎發其神
聖鼻鉤輪無此斲
流傳什伯甲子餘
玉采珠光破冥寞

鄧江古寺秋日暉洗滌翳晴煩發籥稽首調御天人師
優鉢曇華開一萼

題釋迦出山圖

元 柳 貫

耳輪卓朔髮垂肩碧眼初開濯淨蓮優塞波王先頂禮
明星一點正當天

獄中見壁畫佛

唐 劉長卿

不謂銜冤處而能窺大悲獨棲叢棘下還見雨花時地
狹青蓮小城高白日遲幸親方便力猶畏毒龍欺

畫圖見金粟佛

宋黃庭堅

丹青貌金粟影毛物宜管城公只今為君落筆他日聽
我談空

僕曩於長安陳漢卿家見吳道子畫佛碎爛可惜
其後十餘年復見之於鮮于子駿家則已裝背
完好子駿見遺作詩謝之

宋蘇軾

貴人金多身復閒爭買書畫不計錢已將鐵石充逸少
更補朱絲為道玄煙熏屋漏裝玉軸鹿皮蒼壁知誰賢

吳生畫佛本神授夢中化作飛空仙覺來落筆不經意
神妙獨到秋毫顛我昔長安見此畫歎息至寶空潛然
素絲斷續不忍看已作蝴蝶飛聯翩君能收拾為補綴
體質散落嗟神全志公彷彿見刀尺修羅天女猶雄妍
如觀老杜飛鳥句脫字欲補知無緣問君乞得良有意
欲將俗眼為洗滌貴人一見定羞忤錦囊千紙何足捐
不須更用博麻縷付與一炬隨飛煙

記所見開元寺吳道子畫佛滅度以荅子由

宋
蘇軾

西方真人誰所見
衣被七寶從雙狻
當時修道頗辛苦
柏生兩肘烏巢肩
初如濛濛隱山玉
漸如濯濯出水蓮
道成一旦就空滅
奔會四海悲人天
翔禽哀響動林谷
獸鬼踴躅淚迸泉
龐眉深目彼誰子
繞林彈指性自圓
影如寒月墮清晝
空有孤光留故躔
春遊古寺拂塵壁
遺像久此霾香烟
畫師不復寫名姓
皆云道士口所傳
縱橫固已蔑孫鄧
有如巨鰐吞小鮮
來詩所誇孰與此

安得攜挂其傍觀

題彌勒像

宋

米芾

如來隨釋迦骨人不識彌勒佛

問蔡肇求李公麟畫觀音德雲

宋

蘇轍

好事桓靈寶多才顧長康何嘗為人畫但可設奇將久聚要當散能分慰所望清新二大士界我夜燒香

題劉氏所藏展子虔感應觀音

二首

宋

黃庭堅

人間猶有展生筆佛事蒼茫烟景寒常恐花飛胡蝶散
明窓一日百回看

羣盜挽弓江艤船丹青當在普通前誰能與作赤挽板
老筆猶堪壽百年

醉作觀音像仍為書贊

三首

宋

白玉蟾

柳絮多頭緒桃花好面皮夫是之謂誰東海比丘尼
頂戴彌陀呈醜拙手持楊柳惹塵埃縱饒入得三摩地
當甚街頭破草鞋

花紅柳綠菩提相燕語鶯啼般若宗更去補陀山上覓
雲濤煙浪捲天風

題辛澄蓮華觀音像應制

元揭傒斯

至人不可測宴坐青蓮華珠纓被玉體白豪貫彤霞從
何得此相來置玉皇家

觀世音菩薩贊

明焦竑

菩薩法身無有邊垂眉趺坐示人天水灑楊枝生紫烟
神光晝夜籠層巔慈悲普現衆目前誰其苦難相糾纏

欽定四庫全書

新定歷代題畫詩卷
卷六十五

空山冥冥月映泉願同觀者心超然

規公業在淨名得甚深義僕近獲顧長康月宮真
影對戴安道所畫文殊走筆此篇以展瞻禮

唐

李羣玉

五濁之世塵冥冥達觀棲心於此經但用須彌藏芥子
安知牛跡笑東溟王公吐辯真無敵顧氏傳神實有靈
今日淨開方丈室一飛白足到茅亭

過廣愛寺見三學演師觀楊惠之塑寶山朱瑤畫

文殊普賢

三首

宋蘇軾

寓世身如夢安閒日似年敗蒲翻覆卧破械再三連勸
客眠風竹長齋飲石泉回頭萬事錯自笑覺師賢

妙蹟苦難尋茲山見幾層亂峰螺髻出絕澗陳雲崩措
意元同畫觀空欲問僧莫教林下意終老歎何曾

朱瑤唐晚輩得法尚雄深蒲寺空遺跡何人識苦心長
廊敲雨脚破壁撼鐘音成敗無窮事他年復弔今

將出洛城過廣愛寺見三學演師引觀楊惠之塑

欽定四庫全書

蘇軾詩集卷之五

寶山朱瑤畫文殊普賢

三首

宋蘇轍

寺古依喬木僧閒正莫年為生何寂寞愛客尚留連
虛室無尋丈青山有百層迴峰看不足危石恐將崩
聽法來天女依巖老梵僧須彌傳納芥觀此信還曾

壁毀丹青在移來殿廡深賦形驚變態觀佛覺無心
旌旆翻空色笙竽含妙音風流出吳樣遺法到如今

畫文殊普賢

宋蘇轍

誰人畫此二菩薩趺坐花心乘象後弟子先後執盂缶
老僧槎牙森比肩山林修道幾世劫顏貌偉麗如開蓮
重崖宛轉帶林樹野水荒蕩浮雲天峨眉高處不可上
下有絕磴鋤九泉朝陽未出白霧起有光升天如月圓
靈仙居中粗可識有類白兔依清蹕遊人禮拜千萬萬
迤邐漸遠如飛烟五臺不到想亦爾今之畫圖誰所傳
吾兄子瞻苦好異敗繒破紙收明鮮自從西行止得此
試與記錄代一觀

武宗元比部畫文殊玄奘

宋 蘇轍

遺墨消磨顧陸餘開元一一數吳盧本朝唯有宗元近
國本長留後世模出世真人氣雍穆入蕃老釋面清羸
居人不惜遊人愛風雨侵陵色欲無

貫休應夢羅漢畫歌

唐 歐陽炯

西嶽高僧名貫休孤情峭拔凌清秋天教水墨畫羅漢
魁岸古容生筆頭時捎大絹泥高壁閉目焚香坐禪室
忽然夢裏見真儀脫下袈裟點神筆高握節腕當空擲

悉窺毫端任狂逸逡巡便是兩三軀不似畫工虛費日
怪石安排嵌復枯真僧列坐連跣趺形如瘦鶴精神健
頂似伏犀頭骨麤倚松根傍巖縫曲錄腰長身欲動看
經弟子擬聞聲瞋睡山童疑有夢不知夏臘幾多年一
手撐頤偏袒肩口開或若共人語身定復疑初坐禪案
前卧象低垂鼻崖畔戲猿斜轉臂芭蕉花裏刷輕紅苔
蘚文中暈深翠硬筇杖矮松床雪色眉毛一寸長繩開
梵筴兩三片線補衲衣千萬行林間亂葉紛紛墮一印

殘香斷烟火皮穿木屐不曾拖
筍織蒲團鎮長坐休公
休公逸藝無人加聲譽喧喧遍
海涯五七字句一千首
大小篆書三十家唐朝歷歷多
名士蕭子雲兼吳道子
若將書畫比休公只恐當時浪
生死休公休公始自江
南來入秦於今到蜀無交親
詩名畫手皆奇絕觀爾凡
人爭是人瓦棺寺裏維摩詰
舍衛城中辟支佛若將此
畫毘量看總在人間為第一

題龍眠十八尊者

宋

劉克莊

嘗聞天台境肉身往無從仁夫示此圖恍惚游其中應
真一一若舊識或跼怪石臨飛淙山鬼投牒何敬恭天
女問法尤丰茸盆魚鬢鬣等鍼粟放去天矯擎空濛山
深無人地祇出被服導從侔王公前驅驚獸後夔魍徐
行殿以一瘦筇巉巖蒼壁謾謾松下有老宿眉雪濃石
橋滅沒雲氣斷似是鬼國非天宮層冰融結挾怒瀑毒
虺噴薄含腥風至人於此方入定壞衲暴首枯株同等
閒一坐六十劫汝技有盡吾無窮書生往往談性命怵

以禍福猶兒童倒持手版口勸進對此寧不面發紅我
知龍眠筆外意要與濁世鍼盲聾退之云釋善變幻愷
之謂畫能神通幻耶神耶兩莫詰與子持叩西山翁

題羅漢過海圖

元
吳澄

阿誰解衣磴礪羸寫此中乘第一果等閒地獄駭屠沽
如許風波無不可巨浸彌天靈怪百現前幻境元非我
騰踏逍遙容易去只有雲空無障裊般若岸金剛山超
登只在霎時間為吾說與諸尊者更有海門關外關

羅漢圖

元 吳 澄

四大假合成幻身大地山河俱幻境
傀竒礫硤十八尊得遇世尊為摩頂
諸多伎倆近狡獪雖未大乘亦機警
有能領取象外意閉目超然發深省
畫人漫灑毫端墨觀者只疑燈下影
慈尊長閔衆生癡直到於今癡不醒

渡水羅漢圖

元 袁 桷

洞口泉分岸渺茫意行的的水中央
相看總絕神通想不用折蘆歸故鄉

羅漢圖

元
袁桷

四果圓融德自如天台樓閣總虛無何人繪畫供青眼
拍手雲中笑客愚

羅漢圖

元
虞集

神光炯炯視容直坐展兩足手按膝雨龍還入軍持水
風水拂著盤陀石深山海島非人間碧桃花開啼鳥閒
法雲還為等慈起矍然飛錫無留難

畫羅漢

元
虞集

虎嘯千山水葉空
晴空無處著神通
蒼龍浴罷軍持水
閒翫明珠似日紅

李公麟大阿羅漢圖

元 吳 鎮

瀟灑龍眠不可呼
彩毫猶喜未模糊
天台五百知何處
還向圖中證有無

題秦東山藏主十八開士圖

元 張 翥

環瀛茫茫去不窮
大鯨吹浪鼓颼風
棲船如山不敢過
況在泛葦浮蕉中
西方十八大尊者
徑渡萬里猶乘空

犀行水開蛟蜃露直下蹋入天吳宮龜魚背高孟錫穩
中流正與靈槎同怪頭達枿四罔象一簾舁出龐眉公
鼻端噓氣作飛塔舌上彈呪招降龍兩僧促膝披貝葉
一衲裹足須山童雪毛白鹿岐角健班尾黑虎雙睛紅
最後坐禪如古佛從渠搏控何神通吾聞浮屠多善幻
作詩自賞畫者工君不見海波橫潰鬼神惡我無其術
安能東

畫羅漢

元
李祁

空山極寂闐自足，斷緣想況此山中人。
智識已超朗坐，久忘朝晡習定，非勉強，豈惟人所知。
異類亦欽仰，乃知象教力兼用，服夔魍嗟嗟。
世中人擾擾向塵網，叩爾寂無言，何由測深廣。

題過海羅漢圖

二首

元王循

無際洪波接遠空，神機密運訪龍宮。
旌幢出迓烟霞重，此事荒唐竟莫窮。

超塵何必眷情交，棄却禪心躡海濤。
來往不殊商賈慮，

瑤池又恐宴蟠桃

題羅漢圖

元 釋恕中

諸諦空來世所無神通百變絕名模不知何處留蹤跡
却被人傳作畫圖

題楊子文羅漢渡海圖

明 張以寧

天台之東巨瀛海濛濛元氣浮無邊應真十六山中來
徑度萬里蛟鼉淵巨靈前驅海若伏翠水帖帖開紅蓮
神螭猛獸競軒翥宮龜巨魚相後先一山浮玉當其前

石室古蘚垂千年異人高居役衆鬼挽過巨浸如飈旋
貝宮神君迎且拜明星玉女爭花妍陰風黯淡百怪集
芙蓉旂影飛翩翩石橋迴望渺何處紫翠明滅空雲烟
問渠飛錫何所往母乃鷲嶺朝金仙金仙雪山方宴坐
笑汝狡獪何紛然書生平生未省見太息此畫人間傳
清時麟鳳在郊野白日杲杲行青天

題過海羅漢圖

明僧義金

大地山川境界寬重重涉入一毫端乾坤杖錫飛來去

巨海昇孟勢往還伏虎降龍霞靄靄騰空履漢路漫漫
唐吳寫出聲聞蹟妙用通神幾萬般

次韻張仲舉承旨題盧楞伽過海羅漢圖

明僧來復

僧伽神變妙莫窮去住隱顯如旋風能令大海作平陸
超然獨脫閻浮中山君河伯備灑埽錫飛栢渡雲行空
安禪不避魔鬼窟受齋直入龍王宮文犀赤豹時作伍
玄猿白鹿日與同騰光噓氣閃奔電天鼓震曜驚雷公

世人雖呵小乘法誰獨高舉隨雲龍我昔衡山問方廣
石橋每見馱經童天姝散花跪雙膝金盤笑捧明珠紅
開圖恍忽覩顏色山海遙隔精靈通那知畫者有深意
丹青巧奪造化工君不聞幻游天地同旅泊我身安得
駕鶴從西東

過海羅漢應供圖

明僧來復

大士受齋龍伯宮長驅蛟鰐爭先雄舳艫蔽天不敢渡
冰夷伐鼓洪濤舂騰身何來歷汗漫無乃變幻多神通

兩僧後顧冰雪容浮蕉近隨赤鯁公雲端噓氣作樓閣
赤日照耀青芙蓉中有四鬼舁一翁雪眉垂領衣露背
海神候謁旌旆從赤珠吐燄流星虹跨鼇之叟耀而旌
手扶七尺邛州筇是誰彈舌咒老龍火髻電鬣燒雲紅
五輪舒光迸五色一葦直渡猶行空前登頗忒定初起
欠伸展臂來清風蹋龜騎魚走百怪擔簦負笈趨羣童
入山咫尺見臺殿彷彿微聽青林鐘開圖對我若舊識
便欲巢我雲門松世間浮榮日萬態過眼聚散空花同

誰知神變亦虛幻徒逞狡獪驚盲聾何如乘願降跡閻
浮中法雷大震開羣蒙王城分衛飽香積坐令四海歌
時雍

題景煥畫應天寺壁天王歌

唐歐陽炯

錦城東北黃金地故蹟何人興此寺白眉長老重名公
曾識會稽山處士寺門左壁圖天王威儀部從來何方
鬼神怪異滿壁走當簷颭颭生秋光我聞天王分理四
天下水晶宮殿琉璃瓦綵仗時驅狻猊裝金鞭頻策騏

驕馬毗沙大像何光輝手擎巨塔凌雲飛地神對出寶
餅子天女倒披金縷衣唐朝說著名公畫周昉毫端善
圖寫張僧繇是有神人吳道子稱無敵者奇哉妙手傳
孫公能於此地留神蹤斜窺小鬼怒雙目直倚越狼高
半臂寶冠動總生威容趨蹌左右來傾恭臂橫鷹爪尖
纖利腰纏虎皮斑剝紅飄飄但恐入雲中步驟還疑歸
海東蟒蛇拖得渾身墮精魅搦來雙眼空當時此藝實
難有鎮在寶坊稱不朽東邊畫了空西邊留與後人教

敵手後人見者皆心驚盡為名公不敢爭誰知未滿三十載或有異人來問生匡山處士名稱朴頭骨高奇連五嶽曾持象簡崇為官又有蛇珠常在握昔年長老遇奇蹤今日門師識景公興來便請泥高壁亂搶筆頭如疾風逡巡隊仗何顛逸散漫奇形皆湧出交加器械滿虛空兩面或然如鬪敵聖王怒色覽東西劒刃一揮皆整齊腕頭獅子咬金甲脚底夜叉擎絡鞵馬頭壯健多筋節烏背彎環如屈鐵遍身虵虺亂縱橫遠領鬪髀乾

子裂眉龐眼豎髮如錐怪異令人不可知科頭巨卒欲
生鬼半面女郎安小兒況聞此寺初興置地脈沈沈當
正氣如何請得二山人下筆咸成千古事君不見明皇
天寶年畫龍致雨非偶然包含萬象藏心裏變現百般
生眼前後來畫品列名賢唯此二人堪比肩人間是物
皆求得此樣欲於何處傳嘗憂壁底生雲霧揭起寺門
天上去

題徐商叟所藏李伯時四天王圖

宋

王炎

龍眠有巧手幻出汗血駒老衲或戒之回向心地初遂
畫白衣仙靳與梵釋俱北方四天王亦附瞿曇居雜以
馬龍像宿習終未除四王名字異且復形狀殊信者謂
其有疑者意其無蕩蕩天門高誰能凌空虛何以信不
疑取諸貝葉書子不語怪神從釋恐叛儒語之且不可
筆之其可乎因畫議及此於公意何如

梵隆護法神圖

元
袁
桷

威音無喜亦無嗔寧目揚眉定有因欲識世間平等觀

雲如流水月如輪

僧傳古坐龍圖

嚴東平所藏至元二年秋九月張
簽省耀卿處觀七年閏十一月甲

戊公退馬上偶得時
秋苦旱冬天無雪

元
王
惲

深山大澤物所蟄千丈懸淙挂青壁潭陰水黑不見底
老雨初開元氣濕蒼龍何處行雨歸闕首踞坐紅雲堆
山僧駭絕噤不語萬壑陰霧生緇衣吐哉傳古隱龍性
隔戶寫影窺天機一從元化墮此筆飲海不復觀晴霓
世間畫本萬尺蠖尾鬣一掩無晶輝比年一旱幾焚如

牲幣空事山川
雩羣龍癡睡
洞府黑六合
任使黃靈汚
何當鐵匣出
雷火衝屋而去
騰天衢六丁
奔命僕射御
倒捲溟渤天
瓢斟滂沱一
洗乾坤淨却
斂神功寂若無

稠禪解虎圖

二首

元王惲

宋均政異於菟
去魯宰風行
野雉馴誰為
碧巖方外客
等閒藜杖也
通神

楞嚴堆案滿
凝塵山下閒
來解虎紛千
古阿師公案
在寶香熏徹
百巖雲

水墨達磨像

班惟志筆

元 張翥

佛法無多子
西山雪柱天
應尋葱嶺去
方解少林禪
屨露雙脚屨
衣披半肩虛
空本無住
須借影中傳

題達磨像

明 張鳳翼

速去渡江一葦淹
留面壁九年試問
遊梁入魏幾時却
返西天

題寒拾圖

元 袁桷

二人攜手共嘲吟
古殿修廊自在尋
石壁忽開靈怪絕

可禁飛瀑海潮音

畫兩僮枕帚而睡疑是寒拾應人索咏

明
徐渭

人間何日不塵生掃到何年掃得清輸與天台雙行者
睡彎茗帚午雞鳴

嶺南六祖禪師菩提樹下藏髮窈子圖歌

元
吳萊

蘄州黃梅峙佛場新州獼猴識水香菩提樹間好晏坐

五色頭髮騰毫光金刀剔落受法戒瓦甕瘞藏傳不壞
捩迴萬夫矗梁棟陶冶千聖掀爐鞴南海漂來刹十圍
北宗望斷六銖衣塵境本空空即本風幡飛動動還非
山僧禮拜山鬼護一花五葉開如故寶縷青懸雪嶺烟
神珠紺結丹丘露世人長物合剷除謝公往矣施髭鬚
唐年畫筆石未泐大鑒壇經誰讀得

題李伯時畫船子和尚

二首

宋

王復道

等箇魚兒久未逢滿船明月一絲風離鉤三寸誰開口

打落掀天白浪中

一橈打省猶回首露布須收人與船不著釣絲牽老會
却留戽斗付龍眠

跋船子和尚圖

元王惲

戢戢波間萬鱗遊一鉤那得盡迴頭何如收却綸竿坐
明月干江任自由

題趙千里畫船子和尚卷後

明王世貞

秋江戰寒飈一葉縱橫走船子有伎倆舵柄時在手借

問自渡者還能渡人否

觀壁畫九想圖

唐包佶

一世榮枯無異同百年哀樂又歸空
夜闌烏鵲相爭處林下真僧在定中

鬼佛

宋朱子

冥濛罔象姿相好菩薩面鬼佛吾詎知
水石翫奇變

梵隆畫番王獻佛圖

元吳師道

如來宴息雙趺跌碧海涌座紅蓮敷
身如浮雲與枯枝

一毫無有寧願餘不知何國被服殊緩耳卷髮黃虬鬚
狡倪巨象先後驅寶盤五色摩尼珠歸誠贊貢陳區區
拱手偃立顏和愉分明神化羣情趨眇然韋布一懦夫
乃獨抗論非空無見之不肯修勤劬羣嘲衆嗤謂爾愚
作詩三歎還君圖

吳生畫

金
趙秉文

吳生大士十六像歲久塵昏蛛網絲真物從來有真賞
息軒為作証明師

謝人送栗鼠尾畫維摩

宋黃庭堅

貂尾珍材可筆虎頭墨妙疑神頗知君塵外物真是我
眼中人

楊惠之維摩像

金趙秉文

一點傳心已失機更求形似轉成癡至今遺像兀不語
猶似當初問法時

題李長者畫像

宋孔武仲

礪礪一居士娉婷雙少年對景如無有著書方浩然分

身聊示頸誰語此因緣

題帝王禮僧圖

明
王世貞

昔有龐眉師九載面石壁置心諸地外人天香俱寂經
猿六時拜談鳥掌中食日出天地開藹然旌旗色襯施
填恒河結束儼帝釋雖屈萬乘尊對者了不識一吐無
聖言頓掃有為跡歸路甘雨移青林杏花白

題張僧繇醉僧圖

唐
僧法照

人人送酒不曾沽終日松間挂一壺草聖欲成狂便發

真堪畫入醉僧圖

題畫僧

唐張祜

瘦頸隆肩碧眼僧
翰林親讚虎頭能
終年不語看如意
似證禪心入大乘

畫醉僧

宋陸游

殘雪覆枯顱
手扶短柳栗送酒
無蘇州一醉未易得
青旗獵獵秋風吹
長瓶一吸亦足奇
但辦道傍常醉倒
不須解作藏真草

靈照度丹霞圖

四首

元王惲

衆生種業到無該愛海沈迷喚不迴對證處方唯一捨
不應真假比如來

西江萬有已沈沙更有何心到散花狼似入門三十棒
欺將一語了丹霞

性定情移逐物開力能剛制見英才金沙灘畔風流骨
恐是逢場作戲來

克已先論定力優從今屋漏驗清修禪家多少閒拈弄

冀埽堆頭覓悟頭

題僧圓澤託生圖

元
吳澄

浮泡散作大海水皎月長留萬古秋
幻滅如何重起幻
不騎獅象却騎牛

題本中峰觀蓮像

元
倪瓚

東南唱道據禪林諷咏蓮心契
本心善矣不塵仍不染
美哉如玉復如金三周妙法耆闍崛
十丈開花玉井岑
今日仰師猶古佛風波回首一長吟

題雪寺歸僧圖

元程鉅夫

石頭元路滑更著雪皚皚不敢辭辛苦諸方應供來

秀上人課經圖

明劉泰

山繞清溪樹繞亭隔雲金磬曉泠泠道人不管花開落
白乳香中讀觀經

畫高嶺莫行僧衆

明徐渭

知是峨眉第幾盤客僧愁宿日低山頭陀指與烟生處
只隔紅霞四五灣

題王霽字繡佛齋圖 二首

明董其昌

翦得吳淞水半江
靈山窅兀走閒牕
鏡歌即是廣長舌
大纛豈非精進幢

兵符受自城邊石
心印傳來嶺上衣
拈出齊東青一點
何來神物却能飛

御定歷代題畫詩類卷六十五

欽定四庫全書

御定歷代題畫詩類卷六十六目錄

神鬼類

觀楊之美畫

宋梅堯臣

次韻章禹直開元寺觀畫壁兼簡李德素

宋黃庭堅

堅

題汪季路侍郎所藏吳道子天龍八部

宋樓鑰

金神夜獵圖

宋姜夔二首

題松鶴蔡先生家藏李伯時西嶽降靈圖

明唐同

雷殿畫壁

明鄧韞

遺張仙畫乃作灌口像

明湯顯祖

題關將軍四畫

明王世貞

題舊鍾馗

宋蘇轍

蒲生鍾馗圖

宋文同

終南進士行題馬麟畫鍾馗圖

元薩都拉

鍾馗像

元唐肅

鍾馗部鬼圖 元鄭元祐

馗妹圖 元鄭元祐

鍾馗圖 元馮海粟

題鍾馗役鬼移家圖 明劉基

鬼獵圖 明凌雲翰

鍾馗畫 明凌雲翰

題鍾馗移家圖 明李暉

鍾馗殺鬼圖 明劉溥

題梁楷畫鍾馗

明蔣主孝

鍾馗騎驢圖

明程敏政

鍾馗元夜出遊圖

明吳寬

戲題錢叔寶臨鍾馗移居圖

明王世貞

題龔翠巖中山出遊圖

元宋无

題龔翠巖中山出遊圖

元韓性

中山出遊圖

元王肖翁

中山出遊圖

元李鳴鳳

中山出遊圖

元釋宗衍

和江鄰幾學士畫鬼拔河篇

宋梅堯臣

欽定四庫全書

御定歷代題畫詩類
卷六十六目錄

御定歷代題畫詩類卷六十六目錄

欽定四庫全書

御定歷代題畫詩類卷六十六

神鬼類

觀揚之美畫

宋梅堯臣

天官乘車建朱旗赤幡前亞風卷披二龍緩駕蒼髯垂
印箱傍挈文籍隨雙驂推輓如畏遲行從冠服多威儀
水官自有真龍騎兩佐並跨鯨尾螭步趨羣吏怪眼眉
雲生海面無端涯雷部處上相與期人身獸爪負鼓馳

後有同類挾且搥次執電鏡風囊吹青蛇有角魚足鬚
上下引導神所施地官既失不可知此畫傳是閻令為
設色鮮潤筆法奇絹理膩滑雞子皮吳生龍王多裂隳
八軸展翫忘晨炊李成山水曉景移黃荃花竹雀擁枝
韓幹馬本摸搭時神駿都失存毫釐日高腹枵眼眈眈
邂逅獲見何言疲厚謝主翁意不衰他日飽目看無遺
次韻章禹直開元寺觀畫壁兼簡李德素

宋

黃庭堅

丹青古藏壁風雨飽侵食拂塵開藻鑒志士淚霑臆靈
山遠飛來不可以智測龍神湛回向擁衛立劒戟依稀
吳生手旌旆略可識鴻濛插樓殿毫髮數動植廣牀瞻
二聖有衆供萬億飛行湊六合攬取著一席人人開生
面絕妙推心得李侯天機深指點目所及三生石上夢
天樂鳴我側幽尋前日事晦明忽復易章生南溟鵬籠
檻鎖六翮能同寂寞遊濁酒聊放適西風葉蕭蕭蟋蟀
依牆壁家無萬金產四鄰碁聲急藜羹傲鼎食藍縷亦

山立並船有歌姝粉白眉黛黑期公開顏笑醉語雜翰
墨不須談俗事祇令人氣塞

題汪季路侍郎所藏吳道子天龍八部

宋樓鑰

妙絕天龍八部圖細看真不失錙銖聲名自足高千古
題品尤難遇二蘇旌旆冕旒猶可想鬼神人物亦何殊
君看坐位蘭亭草費盡工夫學得無

金神夜獵圖

二首

宋姜夔

半夜金神羽獵奔走山川百靈雲氣旂旗來下颯然已
入青冥

後宮嬋娟玉女自控八尺飛龍兩兩鳴鞭爭導綠雲斜
墜春風

題松鶴蔡生家藏李伯時西嶽降靈圖

前二人騎
行後三人

徒步狀若馳獵者其最後則有雲氣神人居中
嗟夫禹鼎象姦齊諧志怪世或有之但恨無胥
臣之多聞子產之博物歷覽載籍未遑
夷考模寫畫像為作短篇以俟知者

明
詹同

龍眠居士畫入神展畫冥搜畫中意白日杲杲人出畋
長風蕭蕭雲拂地前有一匹雪色駮次有一匹玄花驄
兩人冠服何其雄若非將相應王公繁纓寶鞍金匱匣
各持羽箭懸雕弓後有三人總徒步蒼鷹黃犬行相從
雲中歛見光燦爛玉輅瑤輿下霄漢不駕紫鳳白麒麟
海犀天駟多奇玩鸞旌虎節旋低昂星仗霞幢互繚亂
無乃朝辭太華峰得非曉過雲臺觀輦中坐者真天人
冕珠龍袞儼昭煥金童玉女續往來慶雲為馭天為階

長眉刷翠面如月知有道骨無塵埃令人可望不可及
恍惚雲中相出入衣霑玉井碧蓮香旗翻仙掌露華濕
我識泰山封禪書不識此畫當何如人言西嶽降靈圖
西嶽或有人間無

雷殿畫壁

明 鄧 韜

藝苑有精能凝神始臻理筆端具天人難以茫昧擬致
道古仙都山水麗清美雷宮設像畫種種盡其技畫得
宋名手善造天神鬼淳古出迢逸意態得深旨左壁挾

風雲沙礫捲空起有神操火具怒目流獍視當其蝕所
及妖窟蕩無址右壁已淋落雲氣來纚纚似聞轟雷車
不及掩其耳南壁雲驂蹕霆旌建旖旎有神被介胄軀
偉髯奮紫執爰見真宰如以職備使北壁當晦冥相去
不辨咫尺有神手天瓢九龍運其水勢欲翻九河雷伯鼓
未已社神走閼闕恐懼違箠詈白旆颺雲表奉令察瘡
否靈祠本清肅長夏顙無泄入門見壁畫鮮不生戰慙
假令革其頑像教良有以邑史有朱生運筆妙莫齒吮

毫追其踪三歎遜前軌道玄貌冥獄施帛日雲委惟以
神妙故歸命雜悲喜歲月如水流藝學日零圯君看郭
恕先畫妙託仙死

遺張仙畫乃作灌口像

明
湯顯祖

青城梓浪不同時水次郎君似別姿萬里橋西左丞相
何知却是李冰兒

題闕將軍四畫

明
王世貞

轅門黑霧草頭靡漁陽突騎俄已矣剗然一聲如裂兕

刀纓絳髮鋒血洗白馬城頭鼓初起北人魄奪南人喜
兗州冀州兩國賊委質酬恩竟誰是有身終為豫州死

賊顏良

鯨波漲天天為赤鼉鼓殷城城欲圻七軍肉臭魚不食
于侯吞聲龐侯吒爾龐七尺殉漢賊碧眼小兒黠於鼪
麥城將星忽中墮高廟神靈扶不得有血還作西川碧
破七軍

金支翠旗晙靄中忽有赤驥騰秋空山都木客爭趨工

馳石白象鞭豐隆幻出七寶須彌宮有為之跡無為功
永寧同泰虛爭雄可憐南北民力盡一炬贏得都城紅
創玉泉

鼎湖龍髯久上天妖魄再作脩羅顛快意一掃猗池穿
彼髯何為扼我咽玄女再授軒皇權七家鏟削沈青煙
寧惟晉人脂其口度支歲歲饒金錢一奠北鹵三千年
平蚩尤

題舊鍾馗

宋
蘇轍

濟南書記今白須歲節鍾馗舊綠襦舉手托天欣見雪
破鞋踏凍可憐渠滔滔時輩今黃壤六六年華屬老夫
兒女未容翁便去銀瓶隔夜浸屠酥

蒲生鍾馗圖

宋文同

寒風酸號月慘苦梟飛狐鳴滿墟墓叢棘亂礪翳野霧
古社禿剝倒枯樹下有三鬼相嘯聚初行誰家作疰忤
痛熱腫痒快嘔吐寒噎咽喉脹臍肚呼巫召覲使呪詛
翁驚嫗忙設賽具茅盤草船置五路飯盂炙串狼籍布

相共收歛各執去方此危坐歎且哺忽爾相視生畏怖
有神傑然駕巨牯前呵後擁役二豎此神散鬼充旦暮
其腹尚餒色躁怒鬼遙見之悉失措竄匿不暇相告諭
酒傾肉落雜穢汚魄魂飛蕩身偃仆一入木底只四據
一尚把盞愕以顧一自隱蔽挨眦覷神用氣攝縛束固
前死八吻無十步計之嚼嚙或味飫蒲生胡為適爾遇
畫之滿卷無一誤筆墨醜怪實可懼持以贈余子何故
搖手不取一錢賂他日乞詩者九屢試為言之寫其故

終南進士行題馬麟畫鍾馗圖

和李五峯

元薩都拉

老日無光霹靂死玉殿咻咻叫陰鬼赤脚行天踏龍尾
偷得紅蓮出秋水終南進士髮指冠綠袍束帶烏鞞寬
赤口淋漓吞鬼肝銅聲剝剝秋風酸大鬼跳梁小鬼哭
豬龍飢嚼黃金屋至今怒氣猶未消髯戟參差努雙目

鍾馗部鬼圖

元鄭元祐

老髯足恐迷陽棘鬼肩藤輿振雙膝前驅肥身兒短黑

非髯嬌兒則已腊後從衆醜服厮役擔攜鬼脯作髯食
鬼肌未必能肥脂舖之空勞髯手擘彼瘦而巾褶長窄
無乃癯儒執髯役其餘醜狀千百態專為世人尸辟怪
楚龔獐老非其類請問何由識其槩想龔目睛爍陰界
行尸走鬼非殊派民膏民脂飽死後却供髯餐縮而瘦
無由起龔問其侯有嘯於梁妖莫售大明當天百祿轉
物不疵厲民長壽

馮妹圖

元
鄭元祐

天寶治衰妹兄出白晝宮庭馘獐獠妹時何在不佐兄
靚妝自衍妖媚質後來形見知何所百鬼尊之莫敢覩
提劍躍馬從其兄每為人家守環堵老韓飢窮夜縛船
送之不去今幾年妹肯從兄肆屏逐我亦家富黃金錢

鍾馗圖

元
馮海粟

老馗兀興二鬼肩一鬼勃率袋影懸一鬼負劍帽帶旃
一鬼頂顱雙角駢老馗之婦輿蹠蹠其荷輿者鬼婢虔
猫抱掌握鬼妾妍提其奩具雌袂玄攜枕而從服飾鮮

鼠蠅粘綴袴亦然擎擔最緩行李便鬼之嬰孺盛穿聯
囊包橐裏琴能仙瓠壺穹挂呼可憐揭竿之魅愁攀緣
最後甕鬼束縛椽尸而行者猶能前肌肉消盡骨骼纏
物怪種種來無邊神禹鑄鼎今幾年罔兩在此猶翩翩
吁嗟吁嗟問老天

題鍾馗役鬼移家圖

明 劉 基

髯夫當前鰥婦後腊鬼作糧驅鬼負虹蜺可駕雷可車
胡為役鬼來肩輿乃知老馗未公正怙威植私干律令

玄雲沈陰鬼怪多尪乎尪乎奈爾何

鬼獵圖

明 凌雲翰

終南進士乃好武野魅山精皆部伍蒐田也欲從四時
作氣恍如聆一鼓銅鈺先鳴地欲裂阜蓋後張風為舉
蹇驢足跛不受鞭良犬尾搖何用組錦條未許縱蒼鷹
鐵絙猶能縛玄虎跳踉衆鬼為卒徒矍鑠一翁作謀主
或為狼顧背拔鎗或作猱升前試斧鳴鳴口應已張弓
蛇偃肩擔來設弩身憑大盾宛轉遮手弄飛槌高下舞

坐作擊刺衆莫當進退超驤孰敢侮猙獰似覺口吐牙
輕捷渾疑臂生羽逐禽不假御車輿獲獸何勞施網罟
亦如塵世有司存頗類神仙足官府畫工後輩效前人
戲筆何年追舊譜已無吳生名擅場復有顏輝好奇古
周易取象車載一韓子送窮名數五如斯情狀不易知
更欲形容亦良苦且須留取作歲除竹爆一聲春滿宇

鍾馗畫

明
凌雲翰

北風吹沙目欲眯官柳搖黃拂溪水終南進士偃然起

蝟磔於思含缺齒袍藍帶角形甚傀烏帽裹頭鞞露指
白澤在旁口且哆馴擾不異麟之趾手持上帝書滿紙
若曰新歲錫爾祉一聲竹爆物盡靡明日春光萬餘里

題鍾馗移家圖

明

李 暉

綠袍進士掀怒髯飢來嚼鬼如蜜甜酸風苦雨攪白日
移家欲往山陰尖隨兄小妹臉抹漆眼光射人珠的皪
鬼奴鬼妾千萬形蟹怪猫妖最蕭瑟勢能使鬼鬼不違
髑髏在後嗤鍾馗英雄如山堆白骨莫倚區區手中笏

鍾馗殺鬼圖

明劉溥

空山無人夜色寒鬼羣亂嘯西風酸綠袍進士倚長劍
席帽颭影烏鞵寬燈籠無光照斜水怒裂鬼頭燃鬼髓
大鬼跳踉小鬼嚎滿地鵲鵲飛不起如今城市鬼出遊
青天白日聲啾啾安得此公起復作殺鬼千萬吾亦樂
題梁楷畫鍾馗

明蔣主孝

虎口虯鬚真可怪如何不解縛人妖偷花竊笛渾閒事
忍見三郎萬里橋

鍾馗騎驢圖

為周可大
憲使賦

明程敏政

陰風蕭蕭吹髮寒老馗夜踏山雨殘恨生不作中執法
誓死肯負唐衣冠驪山夢破一回首上帝毋煩六丁走
魑魅都歸鞭策中贏得騎驢袖雙手

鍾馗元夜出遊圖

明吳寬

終南老馗狀醜醜虎韉烏弁鴨色袍青天白日不肯出
上元之夜始出為遊遨鬼門闕頭月輪高烏犍背穩如
駝駒鬼婦塗兩頰鬼子垂一髦徒御雜沓聲嗷嘈導以

靈姑旗翼以大食刀茶壘左執鞭質矯右屬橐方明前
持漆燈張若後擁聲旄魑魅魍魎不可一二數肩擔背
負手且操奇形穉色使人怕一似樞駁泉獍兼猿猱戰
傷人血化燐火各出照地點點如焚膏陰風颯颯吹荒
臯百怪屏氣不敢號汝輩遠遁莫我遭我欲飲汝血甘
如飲醇醪我欲啗汝肉美如啗羊羔肯容汝輩在世長
貪饕吁嗟乎老馮真為百鬼中一豪所以唐皇想其像
詔令道士寫以五色毫憶當天寶年左右皆鬼曹太真

宮中逞狐媚祿山殿上作虎嘯當時設有老魑者安得
縱彼二鬼逃便須縛以蒼水使者所捫之赤條獻於天
閭尸諸獸牢寢其皮拔其毛効爾一日驅馳勞坐令溫
泉生汙泥驪山長蓬蒿上除唐家百年害下受唐史千
年褒却來上元夜任爾燒燈并伐磬

戲題錢叔寶臨鍾馗移居圖

明
王世貞

開元宮中鬼稱母丞相中丞恣為蠱帝遣鍾君嗣黃父
逐鬼無功謫荒土山阿被羅者誰姥攜雛橐裝橫周路

髑髏啾啾泣相語夜半應煩老桑煑鍾君好往一返顧
木客跳梁山魑舞君不吾留稍安堵與君傳神叔寶甫
異日相逢莫相苦

題龔翠巖中山出游圖

元 宋 无

鄧都山黑陰雨秋羣鬼聚哭寒啾啾老魑豐髯古幙頭
耳聞鬼聲饒涎流鬼奴輿魑夜出游兩魑劒笠逐輿後
槁形蓬首枯骸瘦妹也黔面被裳繡老魑回觀四目鬪
料亦不嫌魑醜陋後驅鬼雌荷衾枕想魑倦行欲安寢

挑壺抱甕寒凜凜母乃榨鬼作酒飲令我能言口為噤
執縛魍魎血灑髀母乃剝鬼為鬼鮓令我有手不能把
神間意定元是假始信吟翁筆揮灑翠巖道人心事平
胡為識此鬼物情看來下筆衆鬼驚詩成應聞鬼泣聲
至今卷上陰風生老魑氏族何處人託言唐宮曾見身
當時身色相沉淪阿瞞夢寐何曾真宮妖已殘馬嵬塵
倏忽青天飛霹靂千妖萬怪遭誅擊鄴都山摧見白日
老魑忍飢無鬼喫冷落人間守門壁

題龔翠巖中山出遊圖

元 韓性

是為伯強為謫狂睢盱鬼伯髯怒張空山無人日昏黃
迴風陰火隨幽篁辟邪作字魏迄唐殿前吹笛行踉蹌
飛來武士藍衣裳夢境胡為在縑緗中山九首彌荒唐
猶可為人袂不祥是心畫師誰能量筆端正爾分毫芒
清都紫府昭回光三十六帝參翱翔陰氣慘澹熙春陽
為君閣筆試兩忘一念徃復如康莊

中山出遊圖

元 王肖翁

老瞋怒目髯奮戟阿妹新妝臉塗漆兩輿先後將何之
往往徒御皆骨立開元天子人事廢清宮欲藉鬼雄力
楚龔母乃好幽怪醜狀奇形尚遺跡

中山出遊圖

元
李鳴鳳

堪笑龔侯戲鬼神豪端寫出逼真我貧不敢披圖看
恐作揶揄來笑人

中山出遊圖

元
釋宗衍

老髯見鬼喜不嗔出遊夜醉中山春髯身自是鬼龍者

況乃前後皆非人
楚龔老死無知己
生不事人馬事鬼
吁嗟神鼎世莫窺
此圖流傳當寶之

和江鄰幾學士畫鬼拔河篇

宋梅堯臣

蒲中古寺壁畫古畫者
隋代展子虔分明八鬼
拔河戲中建二旗觀却
前東廂四鬼苦用力索
尾拽斷一鬼顛西廂
四鬼來背挽雙手碓下
抵以肩龍頭魚身霹靂
使持鉞植立旗左偏拔
山夜叉右握斧各司勝
負如爭先兩旁撾鼓鼓
四面聲勢助勇努眼圓
臂裊張拳擊捧首

似與暴譴意態全當正大鬼按膝坐三鬼帶鞵一執旃
操刀擐囊力指督怒髮上直筋舊纏虎尾人身又踣顧
蒺藜短挺金鎚堅高下尊卑二十四鬼無黃泉
角錐競強欲何睹曷不各各還荒埏

御定歷代題畫詩類卷六十六

欽定四庫全書

御定歷代題畫詩類卷六十七目錄

漁樵類

王摩詰捕魚圖

宋郭祥正

楊祕監秋江捕魚圖

金趙秉文

王右丞雪霽捕魚圖

元元好問

息軒秋江捕魚圖

元元好問二首

李營丘寒江晚捕圖

元王惲

題輞川捕魚圖

元袁桶

王摩詰春溪捕魚圖

元鄧文原

捕魚圖

元虞集

題馬竹所照磨捕魚圖

元虞集

題臨本捕魚圖

元柳貫

題捕魚圖

元歐陽玄

右丞春溪捕魚

元吳鎮

王摩詰春溪捕魚圖

元黃公望

高侍郎秋江捕魚圖 元張翥

江鄉捕魚圖 元鄭元祐

捕魚圖 明汪廣洋

捕魚圖 明陶安二首

春江捕魚圖 明管訥

李龍眠畫雪中捕魚圖 明唐之玄

清江捕魚圖 明蔣冕

捕魚圖歌 明吳溥

董端明漁父圖

宋陳子高七首

漁翁圖

元程鉅夫

為曹仲堅題漁父圖

元程鉅夫

題春江漁父圖

元楊維禎

秋江漁父圖

元劉秉忠

林志尹秋江漁父圖

明張以寧

西巖漁翁圖

明徐賁

漁翁圖

明吳寬

跋醉漁父圖

元王惲

醉漁圖

明李廷儀

醉漁

明傅汝楫

題醉漁圖

明鄭鵬

題漁娃圖

明楊慎

題鄭子實著色溪山漁樂圖

元龔璘

松雪臨郭熙溪山漁樂

元鄧文原

寒江漁樂圖

元陳樵

漁樂圖

元吳師道

題松雪臨郭河陽溪山漁樂圖

元白珉

江山漁樂圖

元謝應芳

漁家樂題漁樂圖

明劉崧

題漁樂圖

明王綬

題漁樂圖

明陸深

江鄉漁樂圖

明劉溥

題錢舜舉漁樂圖

明沈周

漁樂圖

明徐渭

漁樂圖

明僧來復

漁邨詩話圖

金堯懷英

題漁邨圖

元虞集

漁邨落照

明謝士元

漁邨晚照圖

明朱諫

秋浦晚畧圖

明金幼孜

漁隱圖

元杜本

題賈原善典寶寒潭漁隱圖 明王瀚

題漁隱圖 明文徵明四首

題松溪漁隱圖 明僧元璞

題漁隱圖 明僧智艸二首

御定歷代題畫詩類卷六十七目錄

欽定四庫全書

御定歷代題畫詩類卷六十七

漁樵類

王摩詰捕魚圖

京郭祥正

魚躍魚沉都不知
垂竿只要得魚歸
天寒浪急魚難得
愁入蘆花日又西

楊祕監秋江捕魚圖

金趙秉文

山蒼蒼江茫茫
鳥飛不盡吳天長
潮平漲落洲渚出
秋

風幾舍鱸魚鄉漁郎聚魚鳴兩槳輕罾觸破青山浪脩
鱗出水玉參差晚日搖光金蕩漾長林無聲楓葉丹清
波不動江水寒誰令此圖落塵土乃是楊侯造化之筆
端我披此圖四十載老去而今重見畫空留名字落人
間當日題詩幾人在漁人走利士走名得失與魚相重
輕笑把綸竿渺滄海浩歌直欲膾長鯨

王右丞雪霽捕魚圖

元
元好問

江雲澠澠陰晴半沙雪離離點江岸畫中不信有天機

細向樹林枯處看
漁浦移家媿未能
扁舟蕭散亦何曾
白頭歲月黃塵底
笑殺高人王右丞

息軒秋江捕魚圖

二首

元
元好問

擲網牽罾太俗生
煙波名利不多爭
綠蓑衣底玄真子
可是詩翁畫不成

擊甕喧天網截河
得魚何啻一罾多
漁郎不作明年計
奈此纖鱗細甲何

李營丘寒江晚捕圖

元
王惲

古人不地著所向無賦租漁蠻舟為家一葉縱所如斜
陽淡淡明江湖萬魚戢戢依寒蒲幾家罾網晚未已博
酒欲得松江鱸卧檣傍舫宿波面不爾風浪防艱虞何
當醉帶笭簪去添我煙波作釣徒

題輞川捕魚圖

元
表
桷

洛口疾如箭駢頭頰尾鱗散網巖隈泊千漚水花勻輞
川蓮社侶百味不入脣時危涉飄蕩急管悲青春不如
漁師樂風水候昏昕連檣坐翁媪茗糜接婚姻永謝朝

市客炎涼生喜嗔

王摩詰春溪捕魚圖

元 鄧文原

輞川之景天下奇我惜曾聞不曾識
若人筆端幹元氣萬頃煙濤歸咫尺
漁翁生事浩無窮醉挹青藍洗胃臆
或披蓑笠卧寒蟾或倚孤篷蘸空碧
靜觀此理良可娛應須仰慕王摩詰

捕魚圖

元 虞集

網罟日相從天寒澤國空釣竿長倚樹老却渭川翁

題馬竹所照磨捕魚圖

元 虞 集

霜寒水淨已無魚，漁者縱橫網不陳。
羹食盡供晨市遠，炊煙猶待晚歸餘。
已知漠漠濠梁意，豈盡洋洋鄭沼如。
萬里江湖春雨濶，海鷗不去小舟虛。

題臨本捕魚圖

元 柳 貫

斬筏聯艫縛為柵，中流起冒如舉幕。
取魚計獲有且多，撥刺銀刀長數尺。
船頭五兩受風偏，雙槳乘之轉山急。
夜涼星斗滿川垂，煙銷鮫鰐騰空擲。
江鱗穿柳趁朝虛。

白粲裝囊供日食人生漁樂樂可知雲月為家天一席
翁歌媪醉兒嘯呼有酒盈甌無事役前林楓櫟陳欲凋
後岸茭蘆寒可剔自淮入汴昔所經野步荒郊曾自歷
祇疑輞口舊山川猶是高人畫時迹世言圖畫能象物
風土班班證今昔乾元去亂幾何年右輔分畿無數驛
畋漁樂業迺如此休養真堪遂生息臨摹甚似誰所為
大筆中藏千鈞力君不見舟車入算析毫釐漢皇經國
國未卑雖云山澤有厲禁魚麗以後非無詩

題捕魚圖

元 歐陽玄

太湖三萬六千頃，靈槎倒壓青天影。
大魚吹浪高如山，小魚卷鬣為龍盤。
羣魚聯腴代桴鼓，勢同三軍戰強虜。
長網大罟三百尺，攔截中流若環堵。
吳王宮中宴未闌，銀絲斫膾飛龍鸞。
大官八珍奉公子，猩猩脰脣鯉魚尾。
洞庭木落天南秋，黃蘆滿天飛白鷗。
江頭吹笛喚漁舟，與君大醉岳陽樓。

右丞春溪捕魚

元 吳鎮

前灘罾兮後灘網魚兮魚兮何所往桃花錦浪綠楊村
浦淑忽聞漁笛響我行笠澤熟此圖頓起桃源雞犬想
不如歸向茅屋底老瓦盆中醉春釀

王摩詰春溪捕魚圖

元

黃公望

春江水綠春雨初好山對面青芙蓉漁舟兩兩渡江去
白頭老漁爭捕魚操篙提網相兩兩慎勿江心輕舉網
風雷昨夜過禹門桃花浪暖魚龍長我識扁舟垂釣人
舊家江南紅葉村賣魚買酒醉明月貪夫徇利徒紛紜

世上閒愁生不識江草江花俱有適歸來一笛杏花風
亂雲飛散長天碧

高侍郎秋江捕魚圖

元張翥

秋江水多魚唯唯海風驅潮葭蒹靡輕舸競載罟網出
欲向中流截魴鯉巨鱗有神不可獲騰沓波濤脫泥滓
最憐濡沫筇簞間小白鉞頭尖如指釣璜渭叟晚終遇
西塞玄真徵不起若人自是隱者徒豈比沙島漁蠻子
高髯能畫得玄理塗抹山川游戲爾千巖萬壑堆白雲

稍著人家喬木底眼中之景何所似富春澤畔鷓鴣里
西臺蕭瑟秋風高脚底灘聲蕩清泚我當扁舟衝鴈過
彷彿厓根舊曾艤自知世外漁者材只合投竿老煙水
巨緇未辦五十牂草屨撈鰕從此始

江鄉捕魚圖

元
鄭元祐

人言東坡謫居海上時顧見漁釣之家樂嬉嬉問其生
涯煙波萬頃舟一葉問其日給鰕蟹小鱸日三炊有時
大魚入網即沽酒有時順風張帆即解維不知朝廷尊

嚴百官側枕聽雞起不知行役戴星出入世途愁險歎
蓬牕齁齁子女睡竹笛鳴鳴朝暮吹坡聞其言慘不樂
我身何有恒百罹瘴海南浮天接水家鄉往往夢見之
何如此漁者生不觸禍機羸衣糲飯既飽暖高蓋大馬
空奔馳我觀此圖重歎息無乃有似坡翁所見畫入無
聲詩金緋貴官一射獵漁釣江湖勞夢思投毫寫圖意
可見一舸秋風雙鬢絲

捕魚圖

為蕭楚
芳賦

明
汪廣洋

落花溶溶江水春江上好山如故人兩髯跼蹐事辛苦
舉網絕江遮巨鱗容儀頗亦類古雅匪特臨流羨漁者
天機妙發毫素間畫師豈是無心寫一髯長操百尺竿
一髯屹立當風湍後先指示若為語得失所繫何其難
綠髮小兒殊不癡解帶默默臨清漪偶然一飲坐樹下
鱣鮪有無初不期君不見任公子汎汎揚州弄雲水六
鼇駕出海上來未必竿頭能致此又不見張志和嘯歌
紫芝坐綠莎一絲風月亘終古眼底屑屑浮雲過覽君

此圖動深省世間萬事魚戲鼎唯有渭川姜子牙直釣
下釣滄波冷

捕魚圖 二首

明
陶 安

操舟下網水波深幾簇漁家柳樹陰舉目紛紛爭為利
不知誰有子陵心

蓑笠衰翁凍欲僵溪風吹透稚兒裳幾多辛苦求鮮食
何似安居煮菜羹

春江捕魚圖

明
管 訥

玄真坊中老孫子老去今年不知幾綠蓑短短僅遮身
自小求魚足生理魚倉蟹舍小蓬門一帶編籬住江溪
昨夜青山得雨多門前三尺桃花水大家漁具都上船
水面紛然若浮蟻小兒挾柁立船梢老婦供炊在篷底
大繩屬網絕中流東船纔下西船起須臾兩船相向開
來往風波疾如駛前船得魚先上城後船回篙刺沙觜
此賓此主尚杯盤樵青已卧蘆花裏醒者尚釣醉者眠
東去西來隨所止不欠官家魚稅錢榮辱從來不干已

我家江南山水間煙樹參差絕相似作客天涯未得歸
一見此圖心獨喜俸錢幾時當買山小築茅堂三泖尾
白頭方是謝官時也學漁家從此始

李龍眠畫雪中捕魚圖

明
唐之淳

玉龍行空不成雨首觸銀河落秋浦帝遣神工種白榆
皓鶴飛來老鷗舞榜兒踏船依楚竹不釣齊璜餌荆玉
波寒月黑大星稀萬斛驪珠豈勝掬夜闌絨素報麻姑
桑下塵飛海欲枯何如去作蓬萊主五城不夜無寒暑

清江捕魚圖

明 蔣 冕

漁翁獨愛清江水孤棹橫斜煙雨裏一聲欸乃隔江聞
舉網得魚滿筐美老婦報道茅柴香烹魚斲酒邀客嘗
酒酣熟睡喚不醒滿江風露天茫茫畫工曾向江頭見
幾度臨流深歎羨歸來拈筆寫半幅畫耶景耶皆莫辨
客從何處得此圖壁間彷彿成江湖應知濠濮不在遠
莊生乃是天之徒

捕魚圖歌

明 吳 溥

官河雨後春水渾夾河兩岸皆漁村捕魚但願魚課足
風波雖險寧足論大魚無多趁時賣小魚連船賤如芥
大魚賣錢須納官小魚得錢還酒債漁郎捕魚莫厭貧
官河魚米朝朝新勸郎莫厭漁業賤古來亦有非常人

董端明漁父圖

七首

宋陳子高

處處晴沙著釣綸
鳬飛鷺頗相親
誰知夙昔風雲會
只似尋常江海人

鱸縷絲絲雪色魚
碧筍香細引村沽
江天此樂誰無分

不問官家乞鑑湖

君王獵罷載熊羆，錫壤分茅合霸齊。
邑有魚鹽太多事，脩然何似釣璜溪。

傾吳佐越早經綸，朝市風波猛乞身。
不道五湖春浪急，篷牕還有捧心人。

志和漁隱古仙真，雪水風流見後身。
蓑笠何須訪圖畫，貂蟬凜凜在麒麟。

雷澤田漁翊聖明，射蛟南幸見升平。
稍分天漢昭回象，

更和江湖欸乃聲

風煙回首釣魚臺巾褐從容小殿開自是玉皇香案吏
外邊休奏客星來

漁翁圖

元
程鉅夫

漁翁牽纜漁婦紡膝上兒看棹車響溪南溪北趁冬晴
水急船多欠新網祝兒休啼手正忙網成得魚如汝長
為曹仲堅題漁父圖

元
程鉅夫

風煙浩渺浪拍天百帆齊開爭一先輕舸蕩漾自來去

詩人曾賞古漁父山園別浦樹參差水淨沙明人跡稀
大罾小罟較得失魴鱖暗作枯魚泣直鉞為鉤餌亦無
煙波不見真釣徒林中茅屋是誰子袖手無言方隱几

題春江漁父圖

元 楊維禎

一片青天白鷺前桃花水泛住家船呼兒去換城中酒
新得槎頭縮頸鱖

秋江漁父圖

元 劉秉忠

白蘋紅蓼滿滄洲江上青峯倒玉樓出沒不拘同水鴨

往來無繫伴沙鷗煙波圍繞幾漁舍天地橫斜一釣舟
蓑笠為渠相蓋管瀟瀟風雨不勝秋

林志尹秋江漁父圖

明
張以寧

江風搖柳雲冥冥小漕釣歸潮滿汀賣魚得錢共秋酌
白酒船頭青瓦瓶樵青勸酒溪童舞擊甌唱歌無曲譜
船前野鴨莫驚飛我有竹弓不射汝

西巖漁翁圖

明
徐賁

雲水平生一釣綸扁舟來往楚江濱自燒綠竹炊新飯

誰道煙消不見人

漁翁圖

明
吳寬

數株古樹荒溪濱一竿占斷如無人
溪深水聚魚亦聚誰遣兩翁當要津
葦間大艫何為者亦有長竿手中把
兩翁得魚慎勿爭只學收門取多寡

跋醉漁父圖

元
王惲

浪急舟輕任自由得魚歸去博新篇
醉來省記靈均語獨宿煙蓑笑不休

醉漁圖

明 李廷義

短蓑宿雨晞殘濕一竿深坐磯頭石捲綸歸去踏莎堤
笠影斜翻半山日紅杏橋邊有酒家將魚換酒不須賒
醉倒竹根呼不醒夢魂隨月入蘆花

醉漁

明 傅汝楫

煙輕江上釣初迴呼伴攜魚換酒杯便欲忘言醉蘆葦
獨醒恐有楚臣來

題醉漁圖

明 鄭鵬

去住一葉舟卷舒一竿竹朝從柳岸過夜向蘆汀宿魚
多不賣錢村酒換盈斛鮮膾簇銀絲芳香雜野蔞老妻
笑傾壺稚子歌擊筑醉來橫短楫披襟坦便腹月明風
露淨遽然睡方熟隨流任所之自信穩於屋嗟彼塵世
間風波平地伏紱綬成拘攣車馬生跼蹙華亭鶴不聞
千秋傷二陸

題漁娃圖

明
楊慎

碧玉深沉臂井邊綠珠魂斷舞樓前風流畢竟輸漁父

醉擁漁娃盡日眠

題鄭子實著色溪山漁樂圖

元 龔 璠

東風忽來吹綠雨
閒雲更學苔花舞
山中之人歸未歸
溪上漁舟泛春渚

松雪臨郭熙溪山漁樂

元 鄧文原

峭石浮嵐俯翠微
瀑流飛雨散林霏
漁舟來往清溪曲
悵望行人古道稀

寒江漁樂圖

元 陳 樵

菰蘆滿眼沙際天寒林古樹凝蒼煙長河不是天上來
緣何衮衮生筆端魚龍半隨風雨去舟人漁子空茫然
畫師胷中吞萬有吐出雲夢常八九

漁樂圖

元
吳師道

罾網縱橫來去船老妻含笑小童顛旁人競羨漁家樂
不道羣魚正可憐

題松雪臨郭河陽溪山漁樂圖

元
白珽

遠山近山何歷歷下有長溪橫一碧溪中亦有釣鰲手

此手不遮長安日野橋煙樹接草廬飛流如練懸空虛
截山白雲凝不去要人寫作巖居圖

江山漁樂圖

元
謝應芳

數口妻兒網一張船為家舍水為鄉江南江北山如畫
欸乃聲中送夕陽

漁家樂題漁樂圖

為曾朝佐
郎中賦

明
劉崧

漁家樂船裏為家無土著朝朝日日大江邊長汀短汊
從灣泊醉眠飽食托煙波却笑傍人事耕作月明蓬上

蘆花飛雨打船頭
楓葉落蘆花飛出水
鰕魚秋正肥
侵晨相喚提網去
薄暮放歌收釣歸
夫妻白首相聚有
脚何曾踏山路
教兒打網莫種田
長江有水無荒年

題漁樂圖

明王紱

遙天雨歇明殘霞
涼風颯颯吹蒹葭
晚來隨處可棲泊
五湖煙水皆吾家
得魚且覓秦橋酒
旋采溪毛雜菱藕
除著沙鷗孰可親
隔篷喚取鄰船叟
生計年年一葉舟
全家不識別離愁
兒能斫鱸兒行盞
一笛橫吹萬里秋

題漁樂圖

明陸深

平沙坦路有風濤，便欲移家傍此曹。
鼓擢鳴榔自成趣，賣魚沽酒不辭勞。
拖藍檻水春雲膩，破白船牕夜月高。
收網一燈山下泊，綠蓑衣底讀離騷。

江鄉漁樂圖

明劉溥

桃花雨歇春潮長，江中鯉魚隨水上。
香蒲葉短白鷺飛，漁父乘船自來往。
船頭已冒三丈餘，輓轡引綆如引車。
浪花觸船魚亂躍，兒女相顧爭歡呼。
江頭賣魚朝買穀。

晚來還向江頭宿老翁不愁兒不啼新婦船中炊欲熟

題錢舜舉漁樂圖

明沈周

長江無風縹秋碧鴨嘴平灘引南北水楓脫葉荻花飛
獨許紅龍占秋色東船老漁罾魚立手擘罾竿雙脚赤
清波照魚如可拾自見鬚眉還歷歷老妻背坐乳小兒
似厭大兒爭且索西船收綸唱歌返短楫弄波聲濤濤
一家妻子團圍頭三泖五湖供泛宅得魚換米日日飽
鮮鯉活鱸為黍稷漁船兩葉天地間翻覺船寬浮世窄

與漁傳神雲溪老滿眼江河紙盈尺煙波情性漁不知
令漁見畫漁還惜

漁樂圖

明徐渭

一都寧止一人游一沼能容百網求若使一夫專一沼
煩惱翻多樂翻少誰能寫此百漁船落葉行杯去渺然
魚蝦得失各有分蓑笠陰晴付在天有時移隊桃花岸
有日移家荻芽畔江心射鼈一丸飛葦梢縛蟹雙鼈亂
誰將藿葉一筐提誰把楊條一線垂鳴榔趁獺無人見

逐岸追花失記歸新豐新館開新酒新鉢新薑搗新韭
新歸新鴈斷新聲新買新船繫新柳新鱸持去換新錢
新米持歸新竹然新楓昨夜鑽新火新笛新聲新暮煙
新火新煙新月流新歌新月破新愁新皮魚鼓悲前代
新草王孫唱舊遊舊人若使長能舊新人何處相容受
秦王連弩射魚時任公大餌剗牛候公子秦王亦可憐
祇今眠却幾千年魚燈銀海乾應盡東海腥魚腊盡乾
君不見近日倉庾少人食一魚一沼容不得白首渾如

不相識反眼輒起相彈射蛾眉入宮驥在櫪濃愁失選
未必失自可樂兮自不擇覽茲圖兮三太息噫嗟嗟樂
哉愧殺青箬笠

漁樂圖

為茅指
揮題

明
僧來復

漁郎家住鷓鴣灣水雲千頃茆三間太平身不識官府
只將網罟營朝餐大兒扳罾露兩膊小兒鳴櫓垂雙鬟
煙波託命作畎畝蒲蓼不怕風雨寒東泛白蘋渚西泊
黃蘆灘水邊長見鷗鷺伴天上那識鴈鷺班得魚歸來

慰妻子收拾絲綸坐蓬底菱租剩有輸官錢沽酒街前
糴新米紫蟹黃金鰓白鯽丹砂尾錯雜羅盤餐交歡聚
鄰里有身誰無衣食謀昨日紅顏今白頭銅駝陌上車
如流擾擾塵土何時休我愛嚴子陵脫身如老鶴釣雪
桐江臺高情付寥廓人生何為困羈縛對此新圖想丘
壑扁舟弄月歌滄浪誰似漁家有真樂

漁村詩話圖

金
党懷英

江村清境皆畫本畫裏更傳詩話工漁父自醒還自醉

不知身在畫圖中

題漁村圖

元虞集

黃葉江南何處村
漁翁三兩坐槐根
隔溪相就一煙棹
老嫗具炊雙瓦盆
霜前漁官未竭澤
蟹中抱黃鯉肪白
已烹甘飴當晨餐
更擷寒蔬共萑席
垂竿何人無意來
晚風落葉何毵毵
了無得失動微念
況有興亡生遠哀
憶昔採芝有園綺
猶被留侯迫之起
莫將名姓落人間
隨此橫圖卷秋水

漁村落照

明
謝士元

返照射江臯寒鴉閃歸翼理棹回中流澹彼南山色

漁村晚照圖

明
朱諫

落日遙遙江水綠一葉扁舟當華屋漁翁生計等浮漚
醉來每向滄洲宿野店炊煙暮高樹罷釣收綸且歸去
蒼鷗泛泛似留人逝水無情向何處世人皆巧我獨拙
鼓枻清歌日光沒磻溪舊事總不知手把深杯對明月

秋浦晚罾圖

明
金幼孜

蕭蕭落水水增波
敲岸風涼起棹歌
怪得漁郎羸笑語
晚來罾上得魚多

漁隱圖

為程子
純賦

元杜本

山下白雲縹緲水邊紅樹依稀
信有桃源深處漁人今亦忘歸

題賈原善典寶寒潭漁隱圖

明王瀚

君家舊在寒潭住
故寫新圖寄幽趣
木落秋山潭水空
猶把長竿倚溪樹
角巾野服身翩翩
髣髴當年孟浩然

題漁隱圖

春夏秋冬
四首

明文徵明

江南雨收春柳綠
碧煙斂盡春江曲
十里蒲芽斷渚香
千尺桃花春水足
溪翁鎮日臨清渠
坐弄長竿不為魚
太平物色不到此
安知不是嚴光徒

江頭夏雨十尺強
晚波搖日空江涼
遊魚淺潏樂深數
不謂人間有漁筍
筍得江魚不稅官
自食自漁終歲歡
輸租轉賦世途惡
漁家自得江湖樂

漁翁老去頭如雪
短笠輕蓑舟一葉
百頃魚蝦足歲租

十隻鷓鴣是家業橫笛朝衝柳外風浩歌夜弄波心月
不嫌湖上有風波世路風波今更多

煙沉風緊鳴蕭蓼江湖歲晚玄冥肅寒塘日出曉光浮
村甕茅柴酒初熟網得冰鱗不入城自漉瓦盆招近屬
欸乃一聲煙水長葦深江靜然湘竹

題松溪漁隱圖

明僧元璞

我昔楚江上釣船時往還長歌送落日濯足對青山魚
遊春草裏鳥去白雲間此意孰能解忘言心自閒

題漁隱圖

二首

明僧智舷

江水悠悠白鷺飛
風埃吹不上荷衣
綸竿收起心無事
貪看青山却怕歸

此老行藏何太迂
不甘朝市釣江湖
江湖又欲逃魚稅
勾個漁舟隱畫圖

御定歷代題畫詩類卷六十七